

Rene Herde(AVP)

Nos ta busca desaroyo di pariba di brug cu of sin e refineria



ORANJESTAD - E dos mocionnan cu Parlamento a aproba luna pasa ta duna gobierno e instruccion pa busca tur forma posibel pa habri e refineria den un forma cu e ta keda habri pa hopi aña. E mocion di AVP ta duna gobierno hasta mas tempo cu e mocion di PDR cu a duna gobierno dos luna. AVP ta duna gobierno te fin di aña aki. Pero AVP a bisa gobierno tambe pa no stop di busca otro alternativanan pa desaroyo di San Nicolas y "pariba di brug". Rene Herde' a enfatisa esaki atrobe e siman aki.

Den e conferencia di prensa di partido AVP, el a bisa cu for di e reunion cu e minister di energia el a saca tres conclusion importante. E prome ta cu gobierno ta bon informa y bon prepara pa atende cu cualkier compania cu di berdad tin e capacidad y boluntad pa habri e refineria y tene habri pa hopi tempo. Gobierno tin tur plan y tur informacion di e refineria, di financia necesario, di e mercado di crudo, di refinarianan y di e companianan cu por ta interesa pa habri e refineria na Aruba. E di dos ta cu a sali na cla cu gobierno niun momento a stop di busca activamente pa cumprado of pa companianan cu por habri e refineria y opera esaki pa hopi tempo. E di tres ta cu gobierno a haci bon uzo di e mocionnan di Parlamento pa institui un comision di experto riba tur e terenonan importante manera conocimiento di e refineria, di mercado di crudo, di mercado di placa y di e asuntonan legal cu tin di haci cu e refineria. Ya e comision a cuminsa traha caba. Rene Herde: "Mi ta impresiona pa wak cuanto a haci. Ta di lamenta cu ainda no a logra un reapertura. Cu e comision nobo aki sinembargo ta duna gobierno un empuhe nobo pa haci lo posibel pa e reapertura. Pa AVP e reapertura ta sumamente importante. E ta crea actividad economico nobo na San

Nicolas. E ta crea entrada extra pa nos pais y e ta crea trabou cu bon salario pa hopi hende. Pero AVP ta realistico. Nos no tin mag di laga San Nicolas depende di e refineria so mas."

Desaroyo ta loke ta importante

Segun Rene Herde', loke ta finalmente lo mas importante ta cu ta crea actividad economico nobo y desaroyo nobo na San Nicolas y pa-

riba di brug. P'esey tambe e "Green Corridor", e caminda hanchu nobo entre San Nicolas y Playa ta asina importante. Esey lo ta un estimulo importante pa crea actividad economico pariba di brug. Loke segun Herde' mester ta e meta final, ta cu ta crea cuponan di trabou pariba di brug, cu ta bira atractivo y interesante pa habri negoshi pariba di brug y cu pariba di brug haya un desaroyo economico, fisico y

social nobo cu ta beneficia e hendenan pariba di brug. Rene Herde': "P'esey pa nos e tabata y ta asina importante pa e refineria habri. Pero na final, cu of sin e refineria, nos mester percura pa e desaroyo nobo pa "pariba di brug". Y nos no por warda mucho mas. Nos no por warda pa eternidad pa e refineria habri. E no ta husto pa desaroyo di Aruba of pa desaroyo di pariba di brug. P'esey a pesar cu a haci tanto caba pa haya habri

e refineria, nos kier purba un biaha mas. Pero nos a mira esaki na tempo. Mientrastanto nos a pidi gobierno pa sigui busca otro actividadnan economico manera industria di energia renoba, uzo di e waf pa actividadnan di transporte maritimo regional of turismo. Cua cu e ta, e mester crea actividad economico, cu ta crea trabou y entrada pa nos hendenan. Esey tabata y ta nos meta." Asina Rene Herde' a finalisa. □